

VENDIM
Nr.307, datë 25.3.2009

PËR DISA SHTESA E NDRYSHIME NË VENDIMIN NR.205, DATË 13.4.1999 TË KËSHILLIT TË MINISTRAVE “PËR MIRATIMIN E DISPOZITAVE ZBATUESE TË KODIT DOGANOR TË REPUBLIKËS SË SHQIPËRISË”, TË NDRYSHUAR

Në mbështetje të nenit 100 të Kushtetutës dhe të ligjit nr.8449, datë 27.1.1999 “Kodi Doganor i Republikës së Shqipërisë”, të ndryshuar, me propozimin e Ministrit të Financave, Këshilli i Ministrave

VENDOSI:

Në vendimin nr.205, datë 13.4.1999 të Këshillit të Ministrave, të ndryshuar, të bëhen ndryshimet dhe shtesat e mëposhtme:

1. Në kreun II të titullit III, paragrafi 9 i nenit 248 ndryshohet si më poshtë vijon:

“9. Personat për të përfituar regjimin e magazinës doganore të tipit C, *Duty Free Shop*, duhet të paraqesin një kërkesë me shkrim pranë Zyrës Doganore, ku mendohet të vendoset magazina. Kërkesa formulohet sipas aneksit 26 të Dispozitave të Kodit Doganor dhe i bashkëlidhen dokumentet e mëposhtme:

- a) Plani i vendosjes së magazinës (dyqanit).
- b) Certifikata tatimore, NIPT (fotokopje e noteruar).
- c) Statusi i shoqërisë dhe akti i themelimit.
- ç) Vërtetim nga prokuroria/Ministria e Drejtësisë, që subjekti nuk ka precedentë penalë.
- d) Dokumentet e pronësisë ose kontratës së qirasë për mjedisin që do të përdoret.
- dh) Vërtetim nga zyra tatimore që mbulon aktivitetin, për detyrime të palikuiduara.
- e) Planbiznesin, ku argumentohet qarkullimi vjetor i parashikuar, si dhe numri/lista e mallrave, që do të tregtohen.
- ë) Të dhëna mbi sistemin e skanimit të inventarit si në hyrje, dhe në dalje, si dhe të “Bording pass”, të pasagjerëve, që paraqiten, si klientë të dyqanit.
- f) Planvendosje të dyqanit dhe vendit të magazinimit, kushteve të ruajtjes së sigurisë së mallrave në këto mjedise, mundësinë e mbikëqyrjes nga autoriteti doganor.
- g) Garanci bankare për llogari të Drejtorisë së Përgjithshme të Doganave në shumën 5 (pesë) milionë lekë, në një nga format e garancisë.

2. Në kreun II të titullit III, pas paragrafi 9 të nenit 248 shtohet paragrafi 10, me këtë përmbajtje:

“10. Subjekti i interesuar për të marrë autorizimin, duhet të paraqesë një kërkesë me shkrim pranë degës doganore, që ka kompetencën territoriale mbi mjediset e kërkuara për t’u miratuar si magazinë doganore e tipit C (*Duty Free Shop*). Dega doganore me marrjen e aplikimit nga subjekti i interesuar, nëpërmjet një komisioni prej 3 personash, verifikon dosjen dhe mjediset e propozuara. Verifikimi konsiston në:

- a) vendosjen e dyqanit (hapësira e mjaftueshme e lëvizjes në dalje nga territori doganor i Republikës së Shqipërisë dhe mbas mjediseve të kryerjes së veprimeve me policinë dhe doganën);
- b) analizimin e nevojave në bazë të fluksit të udhëtarëve;
- c) kushtet e ruajtjes së sigurisë së mallrave në këto ambiente (numri i dyerve dhe mundësia e plumbosjes, mbyllja e dritareve etj.), kur godina ekziston, dhe përshtatshmërisë së vendosjes dhe projektit në rastin kur godina do të ndërtohet e re.
- ç) mundësinë e mbikëqyrjes (kontrollit dhe/ose inventarizimit të mallrave) nga autoriteti doganor.

Brenda 15 ditëve nga data që është dorëzuar kërkesa, dega doganore përcjell dosjen në

Drejtorinë e Përgjithshme të Doganave, si dhe një relacion ku sqarohet qëndrimi i komisionit.

10.1 Drejtoria e Përgjithshme e Doganave, pas shqyrtimit nga sektori përgjegjës, brenda 10 ditëve ia përcjell dosjen për miratim Ministrisë së Financave, nëse janë plotësuar kushtet e përcaktuara, në të kundërt ia kthen për plotësim apo për refuzim degës doganore propozuese.

10.2 Ministri i Financave, brenda një afati jo më të gjatë se 30 ditë nga depozitimi i dosjes në drejtorinë që mbulon politikat fiskale në Ministrinë e Financave, miraton ose jo autorizimin, duke njoftuar subjektin dhe Drejtorinë e Përgjithshme të Doganave. Në rastin e mosmiratimit të autorizimit, Ministri i Financave shpjegon arsyet e refuzimit. Subjektet e interesuara kanë të drejtën e ankimit administrativ, në përputhje me dispozitat e Kodit të Procedurës Administrative.

10.3 Autorizimi është i vlefshëm për 5 vjet, me të drejtë rinovimi.

10.4 Subjekti, të cilit i është miratuar autorizimi, njoftohet zyrtarisht të kryejë pagesën e tarifës vjetore të autorizimit për shumën 20 000 (njëzet mijë) euro, në llogari të Drejtorisë së Përgjithshme të Doganave. Me paraqitjen e dokumentit bankar të pagesës, subjekti pajiset me autorizimin përkatës dhe Drejtoria e Përgjithshme e Doganave kryen aktivizimin në sistemin kompjuterik të fillimit të funksionimit të magazinës *Duty Free Shop*. Në rastin e marrjes së autorizimit për magazinë doganore *duty free* në bordin e anijeve dhe të avionëve, tarifa vjetore e autorizimit është 10 000 (dhjetë mijë) euro. Nëse subjekti e merr autorizimin gjatë gjashtëmujorit të parë të vitit, paguhet 100 për qind e taksës, nëse e merr autorizimin në gjashtëmujorin e dytë të vitit, paguhet 50 për qind e masës së tarifës vjetore. Pagesa e tarifës vjetore bëhet një herë në vit, brenda tremujorit të parë të vitit. Edhe në rastin e rinovimit të autorizimit, pagesa vjetore bëhet e plotë.”.

10.5 Subjektet, të cilat operojnë me autorizim/licencë për ushtrim të veprimtarisë *duty free*, brenda një periudhe tremujore, duhet të përshtaten me kriteret e reja dhe të pajisen me autorizimin përkatës. Mospajisja me autorizimin përkatës sipas dispozitave të këtij vendimi, i humbet të drejtën e ushtrimit të veprimtarisë, si *duty free*.

3. Paragrafi 2 i nenit 249 ndryshohet si më poshtë vijon:

“Revokimi i magazinës tip C *Duty Free Shop* bëhet nga Ministri i Financave si dhënës autorizimi, me propozim të Drejtorisë së Përgjithshme të Doganave, kur gjykohet se janë shkelur kushtet e përcaktuara, për ekzistencën e magazinës *Duty Free Shop*. Revokimi bëhet në rastet e mëposhtme:

a) Kur kërkohet nga kompania e autorizuar.

b) Kur magazina tip C *Duty Free Shop* nuk përdoret në masën e mjaftueshme, për të justifikuar ekzistencën.

c) Kur janë identifikuar në mënyrë të përsëritur raste kundërvajtjeje në plotësimin e kushteve për hyrje-daljen e mallrave dhe regjistrimin e tyre.

4. Paragrafi 2 i nenit 225 ndryshohet si më poshtë vijon:

“Me qëllim mbikëqyrjen e regjimit të daljes së mallrave nga *Duty Free Shop*, periodikisht të hënën e parë të çdo muaji, bëhet deklaratë përmblledhëse eksporti për mallrat e shitura.”.

5. Ngarkohet Ministri i Financave për nxjerrjen e udhëzimit për zbatimin praktik të regjimit të magazinës doganore të tipit C, *Duty Free Shop*, në zbatim të këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha